

Pa atrae mas turista

Proyecto pa pone historia di Dande y Gaita Arubano riba Internet



Seccion Hubentud den Movecion ta sigui awe cu mas material relaciona cu e Exposicion "Aruba Nos Herencia" di Colegio EPI-Sector Economico cu a ser teni dia 15 di April, y cu DIARIO a elabora un articulo completo y a sigui den nos seccion pa hubentud cu diferente proyecto individual. Historia di Dande, y con esaki a yega Aruba ta un aspecto cu logicamente e studiantenan concerni mester a investiga, pasobra riba nos pais no tin celebracion di fin di aña of ricibimento di aña nobo sin su tradicional dande.

For di señor Benny

Panneflek, kende ta bezig cu un investigacion hopi grandi, e studiantenan a scucha un di e teorinan cu tin. Esaki ta cu na aña 1814 siete esclavo a huy di Bonaire bin Aruba y nan a bay biba den un di e cuevanan.

Na Aruba e esclavonan a traha cu Fader Piet, y despues di esey (na aña 1827) un di nan, yama Shati, a conocé un mucha muher "Maria Noguera" cu tabata toca riba "troncao" y nan dos a cuminsa canta Dande, por ehemplo ora nan tabata chapi den cunucu y cu nan tabata haya como regalo paña of un pida oro.

E studiantenan a comenta cu e relato cu nan a haya na

Biblioteca Nacional no ta cuadra cu berdad. E historia cu nan a haya na Biblioteca ta bisa cu señor Koolman y su famia a bin cu dande, pero tin fuerte indicacion cu hopi aña prome Dande a cuminsa. Segun e studiantenan e palabra Dande, cu ta di origen Africano, ta nifica "Oh Dios", y no dandare of paranda.

E studiantenan a sigui cu e parti di integracion di gaita den e cultura di Aruba pa loke ta celebracion di Aña Nobo. Esaki a cuminsa na añanan 50 cu Venezolanonan cu tabata yega waf, cu tabata bin na rancho cu nan botonan, tabata toca cuarta anochi, y e Arubianonan tabata bay wak, y asina nan a conoce e instrumentonan y a siña toca.

"Estrella del Barrio" tabata un grupo basta bon cu a nace na 1963, dirigi pa Doedel Sophia y cu a bay Venezuela y a toca hunto cu Cardenales de Lara. Un persona yama Renato Aguirre a yuda nan hopi den e parti di tocamento profesional y e ritmonan cu tin.

Prome cu añanan 80 e gruponan di gaita tabata integra pa mucha homber so, mientras cu gruponan di aguinaldo tabata formá pa mucha muher.

Den e transcurso di añanan 80 diferente grupo di gaita integra pa mucha muher a lanta. Na añanan 70 no tabata tin hopi grupo di gaita pero si tabata existi 30 grupo di aguinaldo. Na 1980 a lanta Chicas Gaiteras y na 1996 Chicas Tropicales, y asina hopi mucha muher a cuminsa toca gaita.

Durante e prome añanan no tabata tin diferencia entre e gruponan di gaita di Venezuela y Aruba, pasobra e gruponan local tabata imita esnan Venezolano. Pero despues e gruponan di Aruba a hinca nan toke propio den gaita, mezcando e ritmonan di tumba, merengue, salsa, road march y a cuminsa compone cancionnan propio. Instrumentonan cu Arubianonan tabata usa na cumzamento ta e cuarta tradicional, tambu, furucu y wiri. Despues nan a bin cu e instrumentonan cu nan tabata usa pa Dande manera tambora, troncao y wiri. Pero por papia di modernizacion



di gaita ora nan a introduci tambe timbal, conga, maraca, tamborin, drumset, piano, baho, marimba, guitarra, trompet, trompet, entre otronan.

Otro parti di e presentacion aki tabata e cuminda tipico di antes, durante celebracion di fin di aña manera bolo di maishi rabo, diferente sorto di ham, lasagna, aroz con pollo, coi dushi, hayaca, pata di porco den vinager, e champagne cu no por a falta, entre otro. Segun e studiantenan pa loke ta trata cuminda Aruba a haya hopi influencia di Spañolnan y Venezolanonan.

E studiantenan aki a haci un demostracion di con pa promove e tradicion di Aruba pa atrae mas turismo, door di un website. Segun un encuesta cu nan a haci cu turistanan, nan a constata cu nan no sa nada di Dande y Gaita aki na Aruba. Pesey nan ta bay introduci e historia cu nan a conta du-

rante e expo, na Ingles y hasta cu musica cu e bishitantenan potencial por scucha via internet. E sistema aki e studiantenan a trahe pa pasa e idea pa ATA y AHATA.

E informacion aki tambe ta aporta un serie di potretan di e gruponan di gaita cu tin na Aruba, y fuera di esey publica un schedule di actividadnan gaitero pa e turistanan ta na altura di esakinan. E historia di gaita y dande tambe lo worde distribui den forma di brochure cu ta splica riba Rey di Dande, e gruponan di Gaita y hopi mas.

Pa prepara e proyecto aki e grupo a cuminsa for di e prome periodo escolar na Augustus 2004. Un trabao excelente cu merece di hopi elogio.

Riba e proyecto bunita aki a traha Uca Hernandez, Jonathan Werleman, Nabilah de Palm y Rachelle Geerman.